



SIARAN AKHBAR

KEMENTERIAN KESIHATAN

**PERUTUSAN
YANG BERTAMBAH
DATO SERI SETIA DR HAJI MOHAMMAD ISHAM BIN HAJI JAAFAR
MENTERI KESIHATAN
SEMPENA HARI TANPA TEMBAKAU SEDUNIA 2024**

**TEMA:
“MELINDUNGI KANAK-KANAK DARIPADA CAMPUR TANGAN
INDUSTRI TEMBAKAU”
“PROTECTING CHILDREN FROM TOBACCO INDUSTRY
INTERFERENCE”**

31 MEI 2024

1. Penggunaan tembakau adalah satu epidemik yang mengancam kesihatan awam terbesar di seluruh dunia. Menurut data yang diperolehi daripada Pertubuhan Kesihatan Sedunia (WHO), tembakau membunuh kira-kira 8 juta orang setiap tahun dan dianggarkan sebanyak 1.3 bilion penduduk diseluruh dunia adalah pengguna tembakau.
2. Dalam beberapa dekad kebelakangan ini, industri tembakau dan yang berkaitan, sering kali dengan sengaja menggunakan pelbagai taktik yang strategik dan agresif dalam menghasilkan pengiklanan dan pemasaran semata-mata bagi menarik orang ramai terutama sekali kanak-kanak dan para remaja untuk menjadi ketagih kepada produk-produk tembakau dan nikotin. Oleh yang demikian, kempen Hari Tanpa Tembakau Sedunia pada tahun ini membawa tema '**Melindungi kanak-kanak daripada campur tangan industri tembakau**

(Protecting children from tobacco industry interference)' yang bertujuan untuk meningkatkan kesadaran tentang pengaruh berbahaya industri tembakau dan yang berkaitan terhadap kanak-kanak.

3. Dari segi pemasaran produk-produk tembakau, pelbagai teknik manipulasi telah digunakan oleh industri tembakau untuk mempengaruhi generasi muda kepada produk-produk tembakau dan nikotin seperti
 - a. Penghasilan produk-produk tembakau yang mempunyai reka bentuk yang bergaya atau berbentuk mainan, perisa yang menarik, bungkusannya yang berwarna-warni dan mempunyai slogan pengiklanan dan penggunaan imej yang disasarkan kepada kanak-kanak;
 - b. Penempatan produk (*product placement*) tembakau dan nikotin dilakukan secara strategik di media-media popular seperti di dalam filem, rancangan TV, muzik dan video muzik yang berperanan untuk menormalkan dan mempopularkan produk-produk tersebut di kalangan generasi muda bagi menarik perhatian mereka dan seterusnya meningkatkan keinginan mereka untuk mencuba;
 - c. Penajaan individu-individu yang berpengaruh (*influencer*) dan mempunyai pengikut (*followers*) yang ramai di media sosial bagi mempromosikan produk-produk tembakau dan nikotin, dan seterusnya mempengaruhi pengikut-pengikut mereka untuk membeli produk berkenaan.

Dengan peningkatan platform media sosial dan pemasaran digital ini, industri tembakau boleh menembus pasaran yang lebih luas dengan kumpulan sasaran yang lebih tepat.

4. Dari segi polisi dan undang-undang pula, industri tembakau dan yang berkaitan seringkali menentang dasar kawalan tembakau dan langkah-langkah berasaskan bukti (*evidence-based*), seperti peningkatan cukai eksais dan larangan menyeluruh pengiklanan, promosi dan penajaan tembakau. Sesetengah kerajaan juga telah diancam oleh industri berkenaan dengan tindakan undang-undang.

5. Menurut *Global Center for Good Governance in Tobacco Control* (GGTC), semenjak tahun 2021, Negara Brunei Darussalam secara berterusan telah mendahului *Global Tobacco Industry Interference Index*, iaitu carta dunia negara yang paling sedikit menerima gangguan daripada industri tembakau. Oleh yang demikian, negara kita telah dianugerahkan *GGTC Global Tobacco Industry Interference Index (GTI) 2023 Integrity Award*, sebagai negara berprestasi terbaik dalam *GTI 2023* kerana melaksanakan Artikel 5.3 di bawah *WHO Framework Convention on Tobacco Control (WHO FCTC)* dengan berkesan di kalangan 90 buah negara, dengan mengeluarkan Surat Keliling Jabatan Perdana Menteri bilangan: 8/2019 yang menegah penglibatan penjawat awam dengan industri tembakau. Anugerah ini telah disampaikan dalam sebuah acara sampingan (*side event*) semasa persidangan sesi ke-sepuluh *Conference of the Parties (COP10) to the WHO FCTC* di Bandar Panama, Panama.

6. Pencapaian seperti ini bukan bererti negara kita terlepas dari menjadi sasaran penjualan produk-produk tembakau dan nikotin seperti rokok dan rokok elektronik. Walaupun di Negara Brunei Darussalam tidak ada pengedar produk tembakau yang berlesen dan penjualan rokok elektronik adalah ditegah, kita masih boleh melihat penggunaan produk-produk tersebut di negara ini, termasuklah di kalangan remaja. Hasil dapatan dari kaji selidik *Global School Health Survey (GSHS) 2019* menunjukkan 9.8% remaja yang berumur 13-17 tahun adalah perokok, yang mana 15.4% remaja lelaki dan 4.3% remaja perempuan. Penggunaan rokok elektronik di kalangan remaja yang berumur 13-15 tahun pula adalah 13.3%, yang mana 19.0% adalah di kalangan remaja lelaki dan 7.1% adalah di kalangan remaja perempuan.

7. Perangkaan ini amatlah membimbangkan kerana bahan nikotin boleh memberi kesan buruk kepada perkembangan otak kanak-kanak dan remaja, seterusnya boleh mempengaruhi fungsi emosi dan kognitif mereka, serta meningkatkan risiko ketagihan terhadap tembakau, nikotin dan bahan ketagihan lain. Individu yang terdedah kepada nikotin pada usia muda adalah lebih cenderung untuk mengalami ketagihan nikotin yang teruk dan akan sukar untuk berhenti. Selain itu, kajian juga mendapati bahawa pendedahan kepada nikotin semasa kanak-kanak dan remaja telah dikaitkan dengan gangguan mood seperti kemurungan dan sebagainya.

8. Justeru itu, saya menggesa generasi muda di negara ini yang sering menjadi sasaran industri tembakau dan nikotin untuk menentang pengaruh industri-

industri tembakau yang menggunakan taktik pemasaran kotor bagi memperjuangkan masa depan masing-masing agar semuanya bebas daripada tembakau dan nikotin. Sebagai generasi masa depan, golongan muda di negara ini haruslah sama-sama berganding bahu untuk tidak menormalisasikan (*denormalising*) penggunaan produk tembakau dan nikotin. Bagi yang ingin berhenti merokok, Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam melalui Kementerian Kesihatan telah menyediakan perkhidmatan Klinik Berhenti Merokok (KBM) di Pusat-Pusat Kesihatan di setiap daerah bagi memberikan khidmat kaunseling serta bantuan farmakoterapi seperti alat gantian nikotin kepada yang memerlukan. Bagi yang berjaya berhenti, Inshaa Allah, pembaikan kepada kesihatan akan dapat dilihat dan dirasakan, serta risiko penyakit-penyakit yang berkaitan dengannya juga akan menurun.

9. Dikesempatan ini, bersempena dengan Hari Tanpa Tembakau Sedunia 2024, saya amat mengalu-alukan kerjasama dan sokongan dari semua pihak untuk sama-sama memperkasa generasi muda di negara ini untuk berganding bahu dalam menentang industri tembakau daripada terpedaya dengan tipu helah mereka. Marilah kita sama-sama berusaha menjadikan Negara Brunei Darussalam sebagai sebuah negara bebas tembakau dan nikotin demi generasi masa depan yang lebih sihat.

-TAMAT-